

# Tessalônica anuabu Paulõ ha katxu hatu kene bumanikiaki

## 2 TESSALONICENSES

---

**Paulõ hatukiri xinānikiaki, na hātcharā**

**1** <sup>1-2</sup> Ë Paulõ, ã merabewanika Silvano inũ Timóteobetã ã ana matu kene bumai uĩrakãwẽ. Tessalônica mae ewapa anushũ mã ikũwaĩbu nukũ Epa Deus inũ nukũ Shanẽ Ibu Jesus Cristobe mã dasikẽ Deusũ matu duawakĩ hawama unãnuma hau matu hiwemakubainũwẽ.

**Jesus Cristo ikũwaĩbu Paulõ hatu xinãkĩ kẽwãkĩ  
Deus hatu yukashũkubainikiaki, na hātcharā**

<sup>3</sup> Ë betsabu inũ ã puibuũ, txanima matũ xinãnẽ Jesus ikũhairawai mã ma yumei kuxipai ã matu unaiĩ. Haskakĩ ana heneama ikũwaĩ betsabube kuxipai nui henenameyamakubaĩshãkãwẽ. Mã haskaya matukiri xinãkĩ Deus matu yukashũkĩ matuwẽ nũ Deus kẽwãkubainaii, haska nuku yunuayarã. <sup>4</sup> Hanua matu itxakawakĩ yumãwãbiaibũ ikũwaĩ kuxipai mã hawa txĩtuãma ikũkainaya haska xinãkĩ hanu ikũwaĩ itxamisbu tibi anushũ benimai nũ matukiri txani nũ hãtxakũkainaii. <sup>5</sup> Bika tenei mã haskaya Deus kaneismatũ yura dasibibu unãkĩ matũ pepawẽ matu unãti watã matukiri pe xinãyã hanu Deus shanẽ ibumis anu habe mã hiwenũ matu hikimashanai nũ unaiĩ.

<sup>6-8</sup> Hamẽ habũ Deusũ hãtxa tapĩkĩ Deuskiri xinãkatsi ikãma inũ Shanẽ Ibu Jesusũ hãtxa txibãkatsi ikabuma hatu manakukĩ kupinũ ika hui nai anua txi here nakua Jesus hawẽ nai tsuma kuxipabuya habube tashnikirã hatu kupi hushanikiki. Na haska bika tenemakĩ nuku nuitapawaiburã, haska Deusũ matu hatu bika tenemairã, hawẽ dateyamakãwẽ. Haska wakĩ habũ matu nuitapawamisbu hatu beshtetã matu inũ nuku itxakawamisbu binumakĩ nuku huĩrũkũmakĩ unãnuma nuku hiwemashanikiki. <sup>9</sup> Hamẽ nuku haska wamisbuwẽ taeshũ habu

kupikĩ nuitapawariakĩ ikibi imakĩ hawẽ kuxipa paewẽ benukĩ inũ hawẽ txasha pepa hawẽrua hatu uĩmakatsi ikama ha bebunua txaihaira hatu putashanikiki. <sup>10</sup>Haskakẽ hawara nukũ Shanẽ Ibukiri nũ matu yusĩ txanitanima mã ikũwaĩwẽ taeshũ hatiãra nukũ Shanẽ Ibu hanu huaitiã dasibi mai hirabi anushũ nũ ikũwãbaunaibũ txanima uĩtã duawakĩ nũ kẽwãshãkanaii.

<sup>11</sup>Haskawẽ taea Deusbe hãtxakĩ matukiri yukakĩ nũ heneismaki. Deusũ matu kenakĩ katunishũ pepabu matu wakatsis ikaikiri matu yukashũkinã, mã ikũwaĩwẽ taeshũ hawẽ kuxipawẽ hamapai pepa akĩ betsabube merabenamei mã hiwekubainũbũ ã matu ea ashũkubainaii. <sup>12</sup>Haska ã matukiri Deus yukashũmiswẽ taeshũ matu uĩkĩ nukũ Shanẽ Ibu Jesus dasibibũ kẽwãshãkanikiki. Mã haska waibu Jesusũ matu duawakĩ matu kẽwãriashanikiki, haska nukũ Epa Deus inũ nukũ Shanẽ Ibu Jesus Cristõ nuku abukĩ haska xinãkubaĩmisrã.

**Jesus ana hushanaikiri Paulõ shabakabi hatu yusĩnikiaki, na hãtxarã**

**2** <sup>1</sup>Ë betsabu inũ ã puibuũ, bari hawẽ henei keyuaitiã dasibibu nuku itxawanũ ika nukũ Shanẽ Ibu Jesus Cristo nai anua ana txĩtũkirã hua nũ habe itxashãkanaikiri matu yuinũ nĩkakãwẽ, <sup>2</sup>eska tashnishanaikiri bebũkiri nũ matu ana shabakabi yusiainã. Tsuãra Yushĩ Papatũ yuia keska xinãkĩ: “Nukũ Shanẽ Ibu Jesus ma huakĩ”, ikĩ matu paraĩbu inũ, yusiã betsa tapitã: “Jesus hune ma huimakiaki”, ikaiibu inũ, nukuki parana ã kene keska bushũ matu yuikĩ: “Paulo eska txanikiki, Jesus ma huimakiaki”, ikĩ mã haska tapiãma ibiaimakẽ matu parãkĩ yuiakeakeaibu nĩkatã e iki huĩti metesheketã matũ xinã hawaira maewai hatuwẽ dateyamashãkãwẽ. <sup>3-5</sup>Ha inũ, matube hiweshũ hawara ã matu yusĩtanimarã, mã ma daki hakimai ikai matu ana yuinũ nĩkakãwẽ. Deus ikũwaĩbu itxapabũ Deus danaĩ txĩtuaĩbũ Jesus hushanai ma kemaya huni txakabu kuxipa bebũkiri ha dukũ hushanikiki, ha huni txakabũ iburã, hau Deusũ kupiti tenetxakayamashanũ Deusũ ma haki tanashũ pewanirã. Ha Deuski sinatamistũ Deusũ yunuti inũ hawẽ nemati danãkĩ hamapai tibi kẽwãkĩ txibaĩbu nemanũ, iwanã, hamapai dami xarabu kẽwãmisbu hatu binukĩ maematã hamebi keĩ hanua Templo Jerusalém anu tsaushũ yuikĩ: “Earã, ã Deuski”, ishanikiki. Haskawẽ taeshũ hau matu parãyamashanũbũ hatu hawa nĩkamayamashãkãwẽ. <sup>6</sup>Ha huni txakabu hawẽ yuba iriamakẽ natiã kaĩmayuama tsuãra nemayukubainai mã unaiĩ. <sup>7</sup>Ha huni txakabu Satanásã kaĩmashanairã, ma hune yubakai dayaikiki, yurabu parãkĩ txakabu ewawairã. Haskabiaya hatũ nemakubaĩmisshũ henea hanua ana nemamakẽ tashnishanikiki. <sup>8</sup>Hanua ha huni txakabu tashnikẽ nukũ Shanẽ Ibu Jesus dasibi hawẽ txasha kuxipaya hukirã ha huni txakabũ kuxipa mebĩkĩ paismawatã hawẽ hashpawẽ shuũ akĩ kupikĩ tenãshanikiki. <sup>9</sup>Ha huni txakabu hawẽ shanẽ ibu Satanásã kuxipa wakĩ

merabewaya dami atimaska betsa betsapa wakĩ yurabu parãshanikiki. <sup>10</sup>Habũ Deusũ kakape Jesuswẽ mekekatsi iki abunameama danãnakĩ txanima hãtxa danaĩbu ha huni txakabunã, txakabu atimapa betsa betsapawẽ hatu parãyã haska uĩtã txibaĩbũ <sup>11</sup>haskawẽ taeshũ Deusũ txani yushĩ hatu parãmaya haska txani hãtxa kẽwaĩbu <sup>12</sup>atimas hanu kupiaitiã ha hãtxa txanima danãkĩ txakabu besti abuaibu Deusũ hatu hawẽ kupishanikiki.

**Hawenabu wanũ, iwanã, bebũkiri Deusũ hatu katunikiaki, na hãtxarã**

<sup>13</sup>Ë betsabu inũ ã puibuũ, Deus matuwẽ nuikĩ matu abukĩ bebũkirihaira matu katuniwẽ taeshũ txanima hawẽ pashati mã bishanai hawẽ Yushĩ Papatũ matu merabewai kai ma matukiri pewanikẽ txanima mã ikũwãyã haskawẽ taeshũ matu meribi waniki. Mã haskakẽ Deus nũ matukiri pe kẽwãshũkubainai. <sup>14</sup>Kakapekiri datã akĩ nũ matu yusiayã Deusũ matu ikũwãmaniki, hau nukũ Shanẽ Ibu Jesus Cristõ kuxipaki dasitã mã hawenabu ikubaĩshanũbunã.

<sup>15</sup>Haskawẽ taea ã betsabu inũ ã puibuũ, matu haska wakĩ katunikẽ nukũ yusiã beya bena hari matũ mae anu kashũ ibubis nũ matu yusĩanima inũ nukũ kenewẽ nũ matu yusiainã, hakimama txibãkubaĩkãwẽ. <sup>16-17</sup>Hanushũ nukũ Shanẽ Ibu Jesus Cristo hamebi inũ nukũ Epa Deus nukuwẽ nuikĩ abukĩ nuku duawakĩ nuku xinã txãkãwã niti ikama nai anu nũ hatube hiweshanai manakamakĩ nuku yubaniki. Hanua mestẽwãtã matũ huĩti xinã txãkãwãkĩ matu kuxipa wai heneama hamapai yuikĩ mã akai pepas hau matu amakubainũbũwẽ.

**Nukũ dayakiri Deus nuku yukashũkubaĩkãwẽ,  
hatu wanikiaki, na hãtxarã**

**3** <sup>1</sup>Ë betsabu inũ ã puibuũ, nũ ma matu kene keyushunai uĩrakãwẽ. Jesuskiri kakape nĩkashũ mã xinã betsa waima keska wakĩ nãta manibaunabũri habũri Jesuskiri kakape nĩkatã hau hawaira xinã betsa watã Deus kẽwãrianũbũ nũ hatu yusiũkubaunaya Deusbe hãtxakĩ kuxipa nuku yukashũkubaĩkãwẽ. <sup>2</sup>Ha inũ, dasibibũ Jesus ikũwãbumawẽ taeshũ yura betsa txakabubu inũ dakeisbumã txakabuwakubaĩkĩ nuku itxakawaiibu hau nuku nemashunũ Deus nuku ea ashũkãwẽ. <sup>3</sup>Haska wakĩ Satanãsã matu kanemakatsis ikaya nukũ Shanẽ Ibu nuku hakimaismatũ nuku shunũbainama matu kuxipa wakĩ mekekĩ txakabu matu binumakubaĩshanikiki. <sup>4</sup>Ha inũ, nukũ Shanẽ Ibube nũ habe dasitã matu yusĩanima hawa heneama txibãkĩ mã habias akubaĩshanai haskakiri nũ matu ikũwaiĩ. <sup>5</sup>Epa Deus nukuwẽ nuimis keskai betsabube mã nuinameairã, haska Cristõ bika tenei hawẽ kuxipa babuama ini keskai maturi mã babuyamanũbũ hau nukũ Shanẽ Ibũ matu merabewakubainũwẽ.

## Txikixbu tapīmatikiaki, na hātcharā

<sup>6</sup>Ē betsabu inū ē puibuū, nukū Shanē Ibu Jesus Cristō nuku yunumiswē taeshū nū maturi yunuai, nīkakāwē. “Nukubetā Jesus ikūwākatsi ibiai tsuara nū yusīā txibāma inū beya bena nū matu yusīma danākī akabumarā, ana hatukiri xināyamakubaīkāwē”, hatu dakewakinā. <sup>7-8</sup>Hamē earā, matube hiweyushū hawa tirumakī matu daketapawama tsuabūra piti nū hamē piāma ikimaki. Haskakī nukū hamapai ibubis bi bariri inū mexu merā dayatxakayamai yumākī nū matu bikawama ikimaki. Matube hiweshū nū matu uīmaima keska ikubaīkāwē, tsua hamē ea iki daketapamarā. <sup>9</sup>Ha inū, nū Jesusū kuxipayabū matu yusīkubaīkī hawē taeshū matū piti nū yukatirubia nukū piti inū nukū tari hawē biti mā nuku devebiakē nū matu hawa yukama ikimaki. Hakia ibubis mekenē dayai haska nū hiwemis keskai matūri nuku txibaī mā hiwekubaīshanūbū nū matu uīmaimaki. <sup>10</sup>Haska matu yusī kaimashū matu yunukī: “Tsuabura dayakatsi ikama txikixaiburā, hau hatu pimayamarianūbūwē”, iwanā, nū matu yusīmaki. <sup>11</sup>Hakia matukiria txani huai nū nīkaxinarā, hatirirā, mā txikix dayama hawawakatsi ikama kaka betsa betsapa besti nīkatā betsabu yui mā yuānanā bestikubaīkanikiaki. <sup>12</sup>Haskakē nukū Shanē Ibu Jesus Cristō kuxipawē nū matu yunuai. Yurabu txikixbu yunukī tapīmakī: “Haska besti hiwetirubuma hau tari meribi hatū daya tapītā ana yura betsabu shetukī yuāmama hau hatū piti inū hatū mabu hau ibubis bikubainūbūwē”, iwanā, matūri mā hatu yununū nū matu yunuriai.

<sup>13</sup>Ē betsabu inū ē puibuū, hawara daya pepa aki mā hawē hiwemis akirā, punu nukai hī ikī heneyamakāwē. <sup>14</sup>Ha inū, nukū hātxa nū matu bumai hatiribū nīkakī tapīkatsi ikama hatū txakabu unaī hau dakenūbū ana hatube mapuyamakubaīkāwē. <sup>15</sup>Hakia hatuki sinatama mī betsabube mī ikai keskakī hatu hātxa txakabuwama hatu yusīkī nema bestikubaīkāwē.

<sup>16</sup>Nukū Shanē Ibū hamebi hawenabu unānuma hiwemakubaīmistū maturi unānuma hiwemakī hawara bari tibi betsa betsapa mā akai hau matu uīrakubainūwē.

<sup>17</sup>Ea Paulō, ē hātxa matu bumakī haska ibubis ē mekenē kenekī ē keyumis keska wakī ē matu ashuaiī, ē tsumapā ana ea ashūamakenā. <sup>18</sup>Haskakē nukū Shanē Ibu Jesus Cristō hau unānuma hawama matu duawakubainūwē.

Hatiski, ē hātcharā.

Paulo